

Bréf fjármálaráðuneytisins til Lindu h.f., Akureyri, um innlent tollvörugjald af PEZ piparmyntutöflum. 149
17. okt.

Þér hafið sent hingað afrit af bréfi frá PEZ í Austurríki, dags. 3. febrúar s. l., og óskið eftir úrskurði ráðuneytisins um það, hvort greiða skuli innlent tollvörugjald af PEZ piparmyntutöflum, sem sýnishorn fylgdi af.

Iðnaðardeild Atvinnudeildar Háskólans hefur rannsakað vöru þessa og reyndist í henni 93% af venjulegum neyzlusykri. Sé litið til þessa sykurmagns og eðli og notkun vörunnar að öðru leyti, ber að telja hana til nr. 6 í 1. kafla 2. gr. laga nr. 60/1939 og greiða af henni kr. 2.10 í innlent tollvörugjald með 560% viðauka og 150% útflutningssjóðsálagi, alls kr. 34.65 af kg.

BYGGINGARSAMÞYKKT

150

22/8 '56

fyrir Austur-Barðastrandarsýslu.

1. gr.

Byggingarsamþykkt þessi nær til hvers konar húsabygginga, er teljast framtíðarbyggingar á jörðum, er til lögbýla teljast, þar með talin nýbýli, svo og byggingar, sem reistar eru á lóðum og löndum innan takmarka sýslunnar.

Undanskildir eru þó ákvæðum samþykktarinnar þeir löggiltir verzlunarstaðir, er hafa sett sér byggingarsamþykkt samkv. lögum nr. 19 frá 20. október 1905. Setji löggiltir verzlunarstaðir sér síðar samþykkt, þá eru þau kauptún þar með undanþegin ákvæðum byggingarsamþykktar þessarar.

2. gr.

Sýslunefnd ræður byggingarfulltrúa í samráði við Teiknistofu landbúnaðarins og Búnaðarsamband Vestfjarða. Hann skal vera húsameistari eða húsasmíðameistari með fullum lögréttindum og ráðinn til tveggja ára í senn.

Byggingarfulltrúi á sæti á fundum bygginganefnda og hefur tillögurétt um öll þau mál, er þær taka til meðferðar.

3. gr.

Laun byggingarfulltrúa greiðast af sýslusjóði, byggingarsjóði, svo og af sýslusjóðum annarra sýslna, sem kynnu að ráða saman byggingarfulltrúa, samkv. ákvæðum laga nr. 26 1. apríl 1948.

4. gr.

Í hverjum hreppi skulu vera byggingarnefndir. Í þeim eiga sæti þrír menn. Skulu þeir vera kosnir af hlutaðeigandi hreppsnefnd og jafn margir til vara. Kosning þeirra fer fram að afloknum hverjum almennum hreppsnefndarkosningum og gildir kosning þeirra jafn langan tíma og kjör hreppsnefndarinnar. Byggingarfulltrúi, er sýslan ræður samkv. 2. gr., á sæti í byggingarnefndum.

5. gr.

Verkefni byggingarnefndar er:

1. Að veita byggingarleyfi samkv. uppdráttum, sem skulu gerðir eða samþykktir af Teiknistofu landbúnaðarins, þegar um lánveitingar eða framlög til bygginganna úr Byggingarsjóði og Ræktunarsjóði er að ræða.

B 39

- 150** 2. Að hafa umsjón með að ákvæðum byggingarsamþykktar og uppdráttum sé fylgt.
 22/8 '56 3. Að veita nýbýlastjórn aðstoð varðandi þau byggingarmál á samþykktarsvæðinu, er henni við koma, að því er tekur til endurbygginga og bygginga á nýbýlum.
 4. Að rannsaka svo oft sem þörf krefur ástand í byggingarmálum í umdæminu og hafa handbærar sem nákvæmastar skýrslur um ásigkomulag bygginga á einstökum jörðum og hvernig þeim er við haldið.

6. gr.

Staðsetning nýrra bygginga, íbúðarhúsa, peningshúsa, svo og annarra útihúsa, skal gerð af byggingarnefnd, að því leyti sem ákvarðanir um staðsetningu ekki falla undir ákvæði laga nr. 20 frá 31. jan. 1952 og reglugerð þeirra laga.

Skýlt er þó byggingarnefnd að framkvæma staðsetningu við endurbyggingu íbúðar- og peningshúsa ef landnámsstjóri álitur tilfærslu nauðsynlega, enda sé staðsetningin framkvæmd í samráði við hann.

7. gr.

Byggingarnefnd hefur allt eftirlit með þeim byggingarframkvæmdum er hér greinir:

1. Íbúðarhúsabyggingum og byggingum, þótt ekki séu úr varanlegu efni, sem byggðar eru fast við íbúðarhús eða í næsta nágrenni við það.
2. Öllum byggingum, sem gerðar verða á nýbýlum í hlutaðeigandi héraði, sem stofnuð eru samkvæmt lögum um landnám og nýbyggðir og endurbyggingar í sveitum.
3. Peningshúsum og öðrum útihúsum, sem byggð eru úr varanlegu efni, svo og öðrum byggingum, sem lán eru veitt til úr Ræktunarsjóði.
4. Aðgerðum á eldri húsum, þegar um meiri háttar breytingar eða aðgerðir er að ræða.

8. gr.

Þeir, sem ætla að láta reisa byggingar eða framkvæma meiri háttar aðgerðir á eldri byggingum, er falla undir verksvið byggingarnefndar, skulu senda tilkynningu um það til nefndarinnar og umsókn um byggingarleyfi. Umsókninni fylgi tvíritaðir uppdrættir af hinu fyrirhugaða mannvirki í mælikvarða 1 : 100, blaðstærð 21 × 30, 30 × 42 eða 42 × 60 og á hverju blaði auður reitur 4 × 5 cm í hægri horni efst. Uppdrættir af húsum sýni grunnfleti kjallara og allra hæða þess, þversneiðingar og allar hliðar og gafla þess.

9. gr.

Byggingarnefndir hreppanna taka á móti beiðnum um byggingarleyfi, hver úr sínu umdæmi. Tilkynnir hún síðan byggingarfulltrúa hverjar beiðnir hafi borizt til nefndarinnar. Heldur nefndin síðan fund, að fengnum tillögum byggingarfulltrúa og úrskurðar hvort leyfin skuli veitt.

Byggingarfulltrúi og byggingarnefndir skulu kynna sér sem bezt byggingar-aðstæður og byggingarþörf, með tilliti til búskapar þess, sem á jörðinni er og verður og annað, er áhrif getur haft á hvern húsakost er þörf fyrir á jörðinni.

10. gr.

Byggingarnefnd hefur heimild til að ákveða, að hús sem ætluð eru til atvinnureksturs, sem hefur brunahættu í för með sér, skuli byggð á afviknum stöðum, eða svo tryggilega útbúin, að fullt öryggi fáiast gegn eldhættu, að dómi nefndarinnar, eða á þann hátt sem gildandi lög um brunamál skipa fyrir.

11. gr.

150

Umsækjanda um byggingarleyfi skal tilkynnt bréflæga hverja afgreiðslu mál hans hafa fengið. Byggingarleyfið skal ritað á hvern uppdrátt og annað eintak uppdráttarins afhendist umsækjanda. Hitt eintakið skal vera í vörzlu byggingarnefndar. 22/8 '56

12. gr.

Enginn má byggja nýtt hús úr varanlegu efni, nema hann hafi áður fengið til þess skriflegt leyfi byggingarnefndar. Enn fremur hefur nefndin gætur á að ný hús séu byggð eins og hún hefur ákveðið og skal hafa eftirlit með aðalviðgerðum á húsum úr varanlegu efni. Byggingarfulltrúi og byggingarnefndarmenn skulu jafnan hafa frjálsan aðgang að byggingum þeim sem eru í smíðum.

13. gr.

Hefji einhver smíði bygginga, sem tilgreindar eru í 7. gr. þessarar samþykktar, án leyfis nefndarinnar, eða byggji öðruvísi en ákveðið hefur verið af Teiknistofu landbúnaðarins og byggingarnefnd, þá skal hann og yfirsmiður hússins sæta sektum frá 100—1000 krónum er renna í sýslusjóð. Nefndin hefur leyfi til að láta rífa niður á kostnað eigenda, það sem sem hefur verið gert, ef henni þykir ástæða til. Hið sama gildir ef byrjað er á verulegum breytingum húsa, sem samþykkt þessi tekur til, áður en fyrir liggur skriflegt leyfi nefndarinnar.

14. gr.

Byggingarnefndum og byggingarfulltrúa er enn fremur falið að hafa:

1. Eftirlit með íbúðum í sýslunni, og leiðbeiningar og íhlutun um nauðsynlegar umbætur á þeim í samráði við héraðslækni.
2. Eftirlit með fjósum og þeim byggingum þar sem vinnsla mjólkur og mjólkurvara fer fram og hlutast til um að bætt verði úr því, sem áfátt er, eftir reglum er þar um gilda eða settir kunna að verða af þeim aðilum, er hafa yfirstjórn mjólkurvinnslumála. Heimilt er byggingarnefndum, þar sem árleg dýralækniskoðun fer fram, vegna mjólkurframleiðslunnar, að krefjast af stjórnnum mjólkurbúa, að byggingarfulltrúi fái ætíð afrit af skýrslu dýralæknis um það atriði, sem áfátt er og máli skiptir í þessu sambandi.

15. gr.

Byggingarnefnd skal halda að minnsta kosti tvo fundi á ári, þar sem tekin séu til meðferðar byggingarmál hreppsins og ráðstafanir gerðar fyrir væntanlegar framkvæmdir.

Aukafundi getur byggingarfulltrúi kvatt saman ef tilefni er til.

Fundir skulu rækilega auglýstir hreppsbúum, með hæfilegum fyrirvara og tiltekinn frestur hvenær erindi skulu hafa borizt til nefndarinnar. Byggingarfulltrúi undirbýr fundina sem bezt, svo unnt sé að afgreiða þau mál sem fyrir liggja.

16. gr.

Gerðir funda byggingarnefnda skal skrá í fundarbók og skal hún undirskrifuð í lok hvers fundar af öllum viðstöddum nefndarmönnum. Bækur þessar og ritföng greiðast af sveitarsjóði. Þóknun til nefndarmanna greiðist úr sveitarsjóði.

17. gr.

Nú er hlutaðeigandi óánægður með ákvörðun byggingarnefndar, og getur hann þá skotið ágreiningnum undir úrskurð forstöðumanns Teiknistofu landbúnaðarins er fellir fullnaðarúrskurð um málið, eftir að hafa fengið skriflegar ástæður beggja aðila.

150

22/8 '56

18. gr.

- Auk þess, sem áður er fram tekið, skulu verkefni byggingarfulltrúa vera þessi:
1. Fara um sýsluna og leiðbeina sýslubúum um hvers konar byggingar, og láta þeim í té eða útvega teikningar af þeim, ef óskað er. Ferðum þessum sé hagað þannig, að hann komi á hvert byggt ból í sýslunni, ekki sjaldnar en fimmta hvert ár.
 2. Vera trúnaðar- og eftirlitsmaður Búnaðarbanka Íslands og nýbýlastjórnar með þeim byggingum, sem byggðar eru fyrir lán eða fjárstyrk frá þessum stofnunum. Hann aðstoði enn fremur, ef þess er óskað við athuganir og tilraunir með byggingarefni o. fl. í því sambandi. Starfssvið byggingarfulltrúa skal nánar tekið fram í erindisbréfi.

19. gr.

Nú setur sýslunefnd reglugerð samkv. ákvæðum 11. gr. laga nr. 108 frá 31. des. 1945 um húsabyggingar í sýslunni er tekur til ákvæða um styrkleika steinsteypu og máttarviða, hæð undir loft, útbúnað reykháfa, yfirklaðningu og raflagnir, eru þær bindandi fyrir alla, er hér eiga hlut að máli.

20. gr.

Með mál um brot á samþykkt þessari skal farið sem opinber lögreglumál, og skal byggingarfulltrúi kæra þau tafarlaust fyrir lögreglustjóra.

Byggingarsamþykkt þessi, sem sýslunefnd Austur-Barðastrandarsýslu hefur samíð og samþykkt til þess að gilda fyrir Austur-Barðastrandarsýslu og sett er samkvæmt ákvæðum laga nr. 108 31. des. 1945, um byggingarsamþykktir fyrir sveitir og þorp, sem ekki eru löggiltir verzlunarstaðir, og laga nr. 26 1. apríl 1948 um breyting á þeim, staðfestist hér með til að öðlast þegar gildi, og birtist til eftirbreytni öllum þeim, er hlut eiga að máli.

Landbúnaðarráðuneytið, 22. ágúst 1956.

Hermann Jónasson.

Árni G. Eylands.

151

24. okt.

AUGLÝSING

um breyting á reglugerð fyrir Snæfellsness- og Hnappadalssýslu, um fjallskil o. fl., nr. 100 17. júlí 1956.

Í stað orðsins Haukabrekkurétt í 28. gr. reglugerðarinnar komi: Brimilsvalla-
rétt.

Reglugerðarbreyting þessi, sem gerð er af sýslunefnd Snæfellsness- og Hnappadalssýslu, staðfestist hér með samkvæmt 41. gr. sveitarstjórnarlaga, nr. 12 31. maí 1927, til þess að öðlast þegar gildi og birtist til eftirbreytni öllum þeim, sem hlut eiga að máli.

Landbúnaðarráðuneytið, 24. október 1958.

Hermann Jónasson.

Þorv. K. Þorsteinsson.